

弘

簡

錄

弘簡錄卷二百六

明刑部員外郎仁和弘齋邵經邦學

皇清翰林院侍講學士四世孫遠平校閱

載記 遼主八之下

道宗太康元年正月壬寅振雲州饑二月丁卯祥州火遣使恤
災四月乙酉如嶺山閏月丙午振平澤二州饑六月癸巳興聖
宮使奚謝家奴知奚六部大王事戊戌知三司使事韓操以錢
穀增羨授三司使癸卯遣使按問諸路囚以叅政柴德滋爲武
定軍節度使九月己卯南京饑免租稅一年仍出錢粟振之十
月西北路部長遐拾離搭雙古等來降十一月辛酉皇后被誣
賜死十二月己丑以耶律藥奴爲惕隱漢人行宮都部署耶律
霖爲北院樞密副使東京畱守同知蕭鐸刺右奄冉里西京畱

守蕭燕六左丞高舉 二年二月戊子振黃龍府饑三月辛酉
皇太后崩遣使報哀於宋并高麗夏國及致遺物丁卯大赦六
月乙酉朔上太行皇太后謚戊子宋及高麗夏國各遣使弔祭
甲午葬慶陵丁未冊皇后蕭氏戊申劉誵復叅政事八月庚寅
獵秋山遇麋失其母憫之不射九月戊午南京蝗免明年租稅
十一月南京地震甲戌上欲觀起居注修注卽不顧及忽突董
等不進各杖罷之 三年正月乙卯省諸道春貢金帛及停輸
尚方銀二月辛卯中京饑罷巡幸四月乙酉泛舟黑龍江五月
丙辰玉田安次螻傷稼癸亥日中有黑子己巳駐蹕嶺山乙亥
乙辛誣奏皇太子以無狀不治出其北院樞密使蕭速撒等
三人於外杖護衛撒撥等六人徙於邊戊寅詔告謀逆事者重
加官賞六月己卯朔乙辛復誣皇太子詔鞠問囚之宮中辛巳

殺宿直官敵里刺等三人壬午殺蕭撻不也等二人癸未復殺耶律撒刺等十人又遣使殺上京留守速撒及已徙護衛撒撥等六人並籍其家乙酉殺耶律撻不也及其弟陳留丙戌廢皇太子爲庶人囚之上京殺東京留守同知耶律回里不戊申遣使按五京諸道獄七月辛亥加誥告護衛太保耶律查刺鎮國大將軍世預突呂不部節度使之選室韋查刺及蕭寶神奴謀魯古並加左衛大將軍十一月乙辛殺皇太子問十二月丙寅預行賀正旦禮是歲南京大熟四年正月甲午振東京饑二月乙丑駐蹕掃獲野戊辰以東路統軍使耶律王九爲惕隱八月癸卯詔有司決滯獄十一月丁亥禁士庶服用錦綺日月山龍之文辛卯錦州民張寶四世同居命爲三班祇候五年三月壬辰加乙辛于越出之以耶律霖爲北院樞密使副使耶律

特里底知北院樞密使事左夷離畢耶律世遷同知北院樞密
使事五月丁亥謁慶陵以林牙耶律永寧爲奪爵畢六月己未
遣使錄囚放進士劉曜等百一十三人八月庚申撰太宗神功
碑立於南京九月壬午禁扈從擾民十月壬子詔惟皇子仍一
字王餘並削降丁巳振平州貧民十一月丁丑召沙門守道開
壇于內殿癸未復南京流民差役三年十二月丙午慧星犯尾
乙卯幸西京戊午行再生禮赦雜犯死罪以下 六年三月庚
寅以忠順軍節度使耶律頗德爲南院大王戶部使陳毅叅知
政事五月壬申免平州復業民租賦一年庚寅旱禱雨六月戊
申以度支使王績叅知政事七月戊辰觀市十月己未朔省廣
德軍節度同知命奉先軍節度使兼巡警乾顯二州庚午劉詵
致事癸酉以陳毅爲漢人行宮都部署王績同知樞密院事十

一月巳丑朔口食癸卯召羣臣議政十二月甲子以耶律特星
底爲孟父敵穩乙丑以南院樞密同知蕭撻不也爲北府宰相
耶律世遷知北院樞密使事耶律慎思同知北院樞密事庚午
免西京流民租賦一年丁亥豫行賀正旦禮 七年正月戊申
五國部長來貢五月癸丑有司奏永清武清固安三縣蝗甲寅
以蕭撻不也兼殿前都點檢知契丹行宮都部署事六月甲子
詔月祭觀德殿每歲寒食并諸帝在時生辰及忌日并詣御容
殿致奠丁卯以翰林學士王言敷叅知政事七月丙申謁慶陵
八月丁卯射鹿赤山加園場使溫葛靜江軍節度使九月戊子
次懷州辛卯次祖州命皇后謁懷祖二陵十月戊辰惕隱王九
轉南院大王夸葛畢奚抄只爲彰國軍節度使十一月乙酉詔
歲出官錢振諸宮分及邊戍貧戶丁亥幸駙馬蕭酬幹第方飲

宰相梁穎諫卽還宮 八年正月丁酉鐵驪五國諸長各貢方

物二月己巳夏國獲宋將張天一遣使來獻壬申以耶律頗德
爲南府宰相兼知北院樞密事三月詔行和忝所定升斗庚戌
黃龍府女直部長木乃率部民內附詔予以官并賜印綬四月
壬戌以耶律世遷爲上京留守六月丁巳以頗德爲北院樞密
使耶律巢哥南府宰相劉筠南院樞密使蕭撻不也兼知北院
樞密使事王績漢人行宮都部署丙子以耶律慎思知古夸离
畢事七月南京霖雨沙河溢永清歸義新城安次武清香河六
縣傷稼九月庚寅謁慶陵丁未駐蹕藕絲淀大風雪牛馬多死
賜扈從官以下衣馬有差十一月壬午以乙室大王蕭何葛爲
南院宣徽使權知奚六部大王事圖赴爲本部大王十二月癸
丑烏古敵烈統軍使耶律馬五爲北院大王 九年正月辛巳

如春水四月丙午朔大雪平地丈餘馬死者十六七六月甲子
轉愼思北院樞密副使庚午詔諸路檢括戶罪至死者原之閏
月丁丑以可汗奴爲南院大王知典中府事邢熙年代爲漢人
行宮都部署王績爲南院樞密副使七月乙酉獵馬尾山丁巳
謁慶陵八月高麗王徽薨九月癸卯朔日食乙酉射熊于白石
山加園場使溫葛左金吾衛大將軍壬申召北南樞密院官議
政事十月丁丑謁德教巳卯劉筠薨壬辰耶律乙辛伏誅十
一月丙午轉蕭何葛南府宰相三司使王經叅知政事兼知樞
密事甲寅詔僧善知營校高麗所進佛經頒行之巳未定諸令
史譯史遷敘等級十二月丁亥以邢熙年知南院樞密使事辛
卯王言敷爲漢人行宮都部署是年放進士李君裕等五十一
人十年二月庚午朔遠萌古國遣使來聘十二月乙未改慶

州大安軍曰興平詔改明年元赦雜犯死罪以下

大安元年正月癸卯王績知南院樞密使事那熙年爲中京留守戊申以樞密直學士杜公謂參知政事四月乙酉宋使來告神宗皇帝崩哲宗嗣位遣使弔祭并賀卽位六月壬申以王績爲南府宰相戊寅宋遣王真甄祐等致遺物十月戊辰夏秉常報國母梁氏哀遣使弔祭甲申以蕭撻不也爲南院樞密使十一月丁酉以南女直詳穩蕭袍里爲北府宰相辛亥史臣進太祖以下七帝實錄丙辰遣使冊三韓國公王勲子運爲高麗國王十二月甲戌宋遣使來謝二年正月癸丑召權翰林學士趙孝嚴知制誥王師儒等講五經大義二月太白犯歲星四月癸丑加統軍使蕭訛都幹太子太保裨將老古金吾衛大將軍蕭雅哥靜江軍節度使耶律燕奴右監門衛大將軍仍賜資諸

軍士五月丁巳朔放進士張穀等二十六人丁丑以牧馬蕃息
多至百萬賞羣牧官以次進階戊寅宰相梁穎出知興中府事
六月丁亥朔以左夸夷畢耶律坦爲惕隱癸卯遣使按諸路獄
壬子高墩以下縣令錄事兄弟及子悉許叙用八月戊子以雪
罷獵九月丙子謁二儀五鸞二殿辛巳召南府宰相議國政十
月丁亥宴國王李秉常薨詔其子乾順知國事十二月己亥李
乾順遣使上遺物是歲賜興聖積慶二宮貧民錢由粟振上京
中京及遼乾順度德五州貧民三年正月詔出戶部粟振諸
路流民及義州之饑又出雜帛賜中京并隈烏古部己卯大雪
二月以民多流散除安泊逃戶徵償法三月免錦州上京貧民
租一年及諸路貢輸之半四月甲辰南府宰相王績薨五月庚
申海雲寺進濟民錢千萬七月庚午大雨罷獵壬辰罷節度使

已下官進珍玩十一月甲寅以耶律坦同知南京留守事耶律
王九爲南府宰相十二月己卯朔以樞密直學士呂嗣立參知
政事四年正月甲寅太白晝見庚午免上京逋逃及貧戶稅
賦甲戌許上京南京良人自鬻丁丑曲赦西京奉聖春泰等州
役徒終身者五歲而免三月乙丑免高麗歲貢己巳振上京及
慶祖春平錦來蘇古復淥鐵等州貧民并免稅租乙酉減諸路
常貢服御物丁酉立入粟補官法癸卯召樞密直學士耶律儼
講常書洪範五月丙寅禁挾私引水犯田六月丁亥以南院樞
密同知耶律誦里知右夸离畢事庚寅耶律頗德致仕七月丙
辰遣使冊李乾順爲夏國王己巳禁錢出境八月庚辰有司奏
宛平永清蝗爲飛鳥所食庚寅謁慶陵十月丁丑獵遼水之濱
癸未免百姓所貸官粟奏己以西北路招討使蕭朽哥知乙室

大王事壬寅詔諸部長官親鞠獄訟十一月庚申興中府民張
化法以父兄犯盜當死請代皆免十二月戊寅耶律王九致仕
癸未以孟父敞穩耶律慎恩爲中京留守閏十二月癸卯預
行賀正旦禮 五年三月癸酉詔析津大定二府精選舉人諭
學者窮經明道四月甲辰以知奚六部大王事涅葛爲本部大
王壬子徵北山甲子霖雨罷獵五月丁亥駐蹕赤勒嶺己丑以
阻卜磨古斯爲諸部長己亥以左祇候郎君班詳穩耶律涅里
知北院大王事六月壬戌以王言敷爲樞密副使前樞密副使
賈士勳叅知政事兼同知樞密院事十月乙巳詔新定法令大
煩復行舊法 六年四月丁酉東北路統軍司設掌法官庚子
以南院樞密同知耶律吐朶知左夸离畢事六月甲寅遣使決
五京囚是年放進士文充等七十二人 七年二月壬寅詔給

渭州貧民耕牛布絹五月己未朔日食六月己亥倒塌嶺人進
古鼎有文曰萬歲永爲寶用丁未端拱殿門災七月戊午朔回
鹵遣使來貢異物不納厚賜遣之八月庚寅霖雨罷獵九月己
亥日本國遣鄭元鄭心及僧應範等二十八人來貢十一月甲
子享祀木葉山 八年三月己亥駐蹕撻里拾浞丁未曲赦中
京蔚州役徒四月丁丑惕隱部長胡里只來附六月乙丑髮國
爲宋使遣使乞援十月丙辰賑西北路饑辛酉阻卜磨古斯殺
金吾吐古斯以叛遣奚六部禿里耶律郭三發諸蕃部兵討之
壬申南府宰相王經薨戊寅以左夸离畢耶律涅里爲彰聖軍
節度使十一月戊子以樞密副使王是敦兼知樞密院事丁酉
通州澹水害稼遣使賑之戊申北院大王合魯薨是年放進士
冠尊文等五十三人 九年磨古斯來侵以知北院樞密事取

律幹特刺爲都統夸离畢耶律吐朶副之龍虎衛上將軍耶律
胡呂爲都監往討積慶宮使蕭紉里監戰七月磨古斯詣西北
路招討使耶律撻不也僞降旣而乘虛來襲撻不也死之阻卜
烏古禮皆叛八月壬子籍詣路兵癸丑以南院大王特末南京
畱守同知鄭家奴與圍場都管徹八並爲西北路行軍都監給
以馬三千往援十月烏古敵烈統軍使蕭朽哥並特抹等奏討
阻卜等部提賞之壬戌以樞密直學士趙廷睦叅知政事兼同
知南院樞密使事甲子宋遣使告其母后曹氏哀遣使弔祭已
已詔廣積貯以備水旱十二月丙辰宋饋母后遺物是歲興
中府甘露降遣使祠佛飯僧 十年正月戊子烏古禮等來降
達里底拔思母二部復來侵四捷軍都監特抹死之二月丙午
西南面招討司奏撻不三月壬申朔日食四月壬寅惕德萌得斯

老古得等各率所部來附詔復舊地丙午烏古部節度使耶律
陳家奴奏討茶扎剌捷辛亥朽哥炎頗里八部來侵擊破之五
月戊午統軍司出兵與敵烈部戰不利教睦宮太師耶律愛奴
及其子死之統軍朽哥有罪除名辛酉以知國舅詳穩事蒲阿
烈同領西北路行軍事六月丙戌和烈葛等部來聘癸巳惕德
來貢是夏高麗國王迎薨于昱來告遣使聘贈九月甲子敵烈
諸長來降釋其罪十月癸巳西北路統軍司獲阻卜長拍撒葛
蒲魯等來獻十一月乙巳惕德銅刮阻卜的烈等來降十二月
癸酉三河縣民孫賓及其妻皆百歲復其家甲戌以樞密副使
王師儒叅知政事兼同知樞密院事乙酉改明年元減雜犯死
罪以下仍除玉田密雲流民租賦一年賜西北路貧民錢
壽隆元年正月命振奉聖州及賜左右二皮室貧民錢賜東北

路貧民緡四月丁卯幹特刺奏討耶棍刮捷五月乙未朔錄有功將士加陳家奴尚書右僕射撒八鎮國大將軍吐朵爲惕隱南京宣徽使耶律特末爲北院大王癸卯贈陣亡者官六月巳巳以知奚六部大王事回里不爲本部大王權參知政事趙孝嚴爲漢人行宮都部署癸巳阻北長杏里底及圖木葛來貢七月庚子阻卜長猛達斯等來貢癸丑頗里八部附進方物甲寅幹特刺奏破磨古斯捷進官九月甲寅祠木葉山丙辰詔西京砲人努人教西北路漢人十一月甲辰憂國進貝多葉佛經是年放進士陳衡甫等百三十人二年正月乙卯駐蹕瑟尼思辛酉市牛給烏古敵烈隈烏古部貧民二月癸亥振達麻里別古部四月巳卯振西北邊軍七月甲午阻卜來貢八月乙丑頗里八部進馬九月丙午徙烏古敵烈部于烏納水以扼北邊之

衝十二月己未幹特刺討梅里急破之奏捷進官乙亥夏國獻
宋俘 三年二月甲辰朔南京水遣使振之丙午阻卜長猛撒
葛粘八葛長禿骨撒梅里急長忽魯八等請復舊地貢方物從
之三月高麗王昱薨四月南府宰相趙延睦出知興中府事五
月癸亥幹特刺復破阻卜六月甲申詔罷諸路驛驛貢新丙戌
詔每冬駐蹕之所宰相以下構宅毋役其民辛丑夏人來告宋
城要地乞遣使諭和庚戌以契丹行宮都部署耶律吾也爲南
院大王八月己亥蒲盧毛朶部長率其民來歸乙巳彗星見西
方九月丁丑以武定軍節度使梁援爲漢人行宮都部署十一
月乙卯蒲盧毛朶部來貢 四年正月己巳徙阻卜等貧民于
山前辛未宋遣使來饋錦綺三月丙子黃河清四月辛丑雨罷
臘五月癸酉那也奏北邊捷六月戊寅謝夏國爲宋所攻遣使

求援丁亥以遼興軍節度使涅里爲惕隱十一月乙巳朔知右
夸离畢事藥師奴樞密止學士耶律儼使宋諷與夏和五年
正月己酉詔夏國王李乾順伐拔思毋等部五月壬戌藥師奴
等使廻奏宋罷兵六月乙未五國部長來朝戊戌阻卜來貢己
亥以興聖宮使耶律蒲家奴爲右夸离畢七月壬寅朔惕德長
禿的等來貢辛亥如大牢古山十月己亥朔高麗王顯遣使乞
封冊以爲三韓國公丁卯宋遣郭知章曹平來聘戊辰賑遼州
饑仍免租賦一年十一月甲戌賑南北二紂乙酉夏國以宋罷
兵來謝十二月甲子轉梁援遼興軍節度使六年正月癸酉
南院大王耶律吾也薨壬午以太師致仕禿開起爲奚六部大
王辛卯幹特刺執磨古斯來獻命磔于市丙申詔問民疾苦癸
丑出絹賜五院貧民辛酉宋遣使告神宗皇帝崩弟徽宗嗣位

遣使弔祭并賀三月甲申弛朔州山林之禁四月丁酉朔日食
五月壬午烏古部破茶扎刺乙酉趙孝嚴薨辛卯宋遣使饋遺
物六月庚子遣使往賀以有司案牘書宋主嗣位爲登寶位上
怒詔奪宰相以下官出鄆顯知興中府事韓資護崇義軍節度
使中丞韓君義廣順軍節度使癸丑阻卜部長來貢戊午遣使
決五京滯獄己未以梁援爲樞密副使七月壬申耶覲刮諸部
寇西北路幹特刺又擊敗之使來獻捷九月癸未望祠木葉山
十月壬寅樞密副使王師儒監修國史甲寅平州饑復其租賦
一年十一月壬寅天德軍民田世榮三世同居詔官之丙子以
安車召鑒巫閭山僧志達設壇於內殿戊子李乾順請尚公主
十二月己亥以郝家奴爲北面林牙庚申帝不豫詔燕國王延
禧擬注大將軍以下官是歲放進士康秉儉等八十七人 七

年正月壬戌朔方疾御清風殿受百官及諸國使賀是夜白氣如練自天而降黑雲起於西北疾飛有聲北有青赤黑白氣相雜而落癸亥如混同江甲戌崩於行宮在位四十七年壽七十七舊史贊曰道宗初卽位求直言訪治道勸農興學救菑恤患粲然可觀及夫謗訕之令旣行告訐之賞日重羣邪並興譏巧競進賊及骨肉皇基寔危衆正淪胥諸部反側甲兵之用無寧歲矣一歲而餽僧三十六萬一日而祝髮三千徒勤小惠蔑計大本尚足與論治哉

載記 遼主之九

天祚皇帝諱延禧字延寧小字阿果道宗嫡孫父太子湣母蕭氏以太康元年閏四月庚戌生賜妃親及東宮僚屬爵賞有差三年太子被誣事旣白帝悔六年三月庚寅封爲梁王加守太

尉兼中書令爲設旗鼓搜刺六人護衛之八年詔加化哥金吾衛大將軍以爲傳導九年十一月丙午進封燕國王大赦命知制誥王師儒牌印郎君耶律固傳導之大安二年六月乙巳阻卜部長余古郝及愛的來朝詔與相結爲友八月己卯出太祖太宗所御鎧仗諭以創業征伐之艱十一月甲戌行再生禮曲赦上京罪囚四年五月辛亥命寫尚書五子之歌六月又命知中丞司事五年十一月丁卯生子大赦妃之族屬爵賞有差七年十月辛巳命總北南院樞密使事加尚書令天下兵馬大元帥壽隆四年復以耶律幹特刺兼契丹行宮都部署以傳導之道宗崩遺詔卽位樞前羣臣上尊號曰天祚皇帝二月壬辰朔改是年爲乾統元年大赦詔凡爲耶律乙辛誣陷者悉復官爵出籍沒還流放有差乙未遣使告哀于宋及西夏高麗三月甲

戊召僧法頤放戒于內庭四月旱六月庚寅朔如慶州甲午宋遣王潛等來弔祭丙申高麗夏國各遣使慰奠庚子上大行尊謚曰仁聖大孝文皇帝廟號道宗及改謚懿德皇后爲宣懿辛亥合葬慶陵自八月至于十月連謁慶懷乾陵甲辰上皇考昭懷太子謚曰大孝順聖皇帝廟號順宗皇妣曰貞順皇后十二月戊子以翰林學士張奉珪叅知政事兼同知樞密院事癸巳宋遣黃寶來賀卽位丁酉高麗夏國並遣使來賀是歲生女直部阿骨打襲節度使二年三月大寒冰復合四月辛亥發乙辛得里特之墓剖棺戮屍以其家屬分賜被殺之家諸黨與子孫徙之于邊六月壬辰以雨罷獵壬子李乾順爲宋所攻遣使求援閏月庚申策賢良壬申降惠妃爲庶人七月獵黑嶺以霖雨給獵人馬十月乙卯蕭海里叛劫乾州武庫器甲命北面林

牙郝家奴捕之以亡入女直不獲免官丙寅以上京畱守耶律慎思爲北院樞密副使十一月壬寅有司請以帝生日爲天興節三年正月辛巳朔女直函蒲海里首來獻二月庚午武清縣大水弛其陂澤之禁五月戊子獵人多亡嚴立科禁七月中京雨雹傷稼十月己巳有事于觀德殿十一月丙申文武百官加上尊號曰惠文智武聖孝皇帝大赦百官各進一階乙巳謁太祖廟追尊太祖之高祖曰昭烈皇帝廟號蕭祖妣曰昭烈皇后曾祖曰莊敬皇帝廟號懿祖妣曰莊敬皇后召監修國史耶律儼纂太祖諸帝實錄是年放進士馬恭回等百三人四年六月甲寅夏國遣其臣李造福田若水來求援七月南京蝗庚辰獵南山癸未以耶律慎思知北院樞密使事辛卯同知南樞密蕭敵里爲西北路招討使十月己酉鳳凰見于鄯陰己未幸

南京十一月乙亥御廵月樓賜貧民錢 五年正月乙亥夏國
乞伐宋丁酉遣樞密直學士高端禮等諷宋罷伐夏兵二月癸
卯徵行視民疾苦三月壬申夏國請尚主凡三以族女南仙封
成安公主下嫁之四月甲申射虎炭山五月壬子宋遣曾孝廣
王戡報聘七月謁慶陵乙卯謁乾陵十一月戊戌禁商賈之家
應進士舉丙辰高麗三韓國公王顥薨子倬來告十二月癸酉
宋遣林洙來議與夏約和 六年正月辛丑遣蕭得里底牛溫
舒使宋諷歸所侵夏地六月辛巳夏國遣使來謝及貢方物十
月乙亥宋與夏通好遣劉正符曹穆來告十一月乙未耶律馬
奴爲奚六部大王丙申行柴冊禮戊戌大赦封皇子敖盧幹晉
王習泥烈饒樂郡王己亥謁太祖廟甲辰祠木葉山 七年放
進士李石等百人 八年四月丙申封高麗王倬爲三韓國公

贈其父顯爲高麗國王六月壬辰西北路招討使蕭敵里率諸
蕃來朝丙申射柳祈雨七月戊辰以雨罷獵十二月己卯高麗
遣使來謝并脩貢 九年三月戊午憂國以宋不歸地遣使來
告七月隕霜傷稼八月丁酉雪罷獵十月癸酉望祀木葉山丁
丑詔免今年租稅是年放進士劉禎等九十人 十年正月辛
丑預行立春禮四月丙戌預行再生禮癸巳獵于北山六月癸
未憂國遣李造福等來貢甲午阻卜來貢是秋連謁慶懷祖陵
十二月己酉改元

天慶元年大饑 二年二月丁酉幸混同江釣魚生女直部長
阿骨打率其弟吳乞買粘罕胡舍等皆來朝嘗從獵能呼鹿刺
虎搏熊上喜輒加官爵適遇頭魚宴上命諸長次第起舞阿骨
打跋扈辭以不能由是見疑七月乙丑獵南山九月己未獲熊

上歡甚燕羣臣親御琵琶是秋駐蹕奉聖州十一月乙卯幸南京丁卯謁太祖是年放進士韓昉等七十七人三年正月丙寅賜南京貧民錢甲戌禁僧尼破戒丙子獵狗牙山三月籍諸道戶徙大年古山圍場地居民于別土阿骨打率五百騎突至咸州吏民大驚自是遇上召輒稱疾不復至矣閏四月左道李弘聚衆爲亂詔支解分示五京十一月甲午以三司使虞融知南院樞密使事西南面招討蕭樂古爲南府宰相四年正月女直阿蘇來奔阿骨打遣人來索七月東北路統軍司奏女直阿骨打反攻寧江州上在慶州射鹿不以介意遣海州刺史高仙壽統渤海軍應援蕭撻不也與女直戰于寧江東敗績十月壬寅以守司空蕭嗣先爲東北路都統靜江軍節度使蕭撻不也副之發契丹奚軍三千中京禁兵及土豪二千別選諸路武

勇合萬餘人命虞候崔公義控鶴指揮邢頴押往軍潰公義頴
及耶律佛畱蕭葛十等死之獲免者僅十七人十一月壬辰都
統蕭敵里等復營幹鄰濼東爲女直所襲死者甚衆甲午免敵
里官辛丑以西北路招討使耶律幹里朶爲行軍都統副點檢
蕭乙薛同樞耶律章奴副之十二月咸賓祥三州及鐵驪兀惹
皆叛入女直乙薛往援賓州南軍諸將實婁特烈等往援咸州
並爲女直所敗五年正月遣僧家奴持書約和阿骨打遣賽
刺復書欲歸叛人遷黃龍府于別地然後議之幹里朶等與戰
于達魯古城敗績二月遣耶律張家奴等齎書斥阿骨打名冀
其速降六月壬子使還復書亦斥上名速降如之癸丑詔諭諸
道車駕親征癸亥以惕隱耶律末里爲北院大王遣蕭辭剌復
使女直以書辭不合見畱七月辛未宋遣使致助軍銀絹丙子

獵于嶺東幹里朶等又敗于白馬濼皆免官八月甲子罷獵始
趨軍中丙寅以閑場使阿不爲中軍都統張家奴爲都監率番
漢兵十萬蕭奉先充御營都統耶律章奴諸行營都部署以精
兵二萬爲先鋒餘分五部爲正軍貴族子弟千人爲硬軍扈從
百司爲護衛軍北出駱駝口復以都點檢蕭胡覲姑爲都統樞
密直學士柴誼副之將漢步騎三萬南出寧江州自長春州分
道而進發數月糧期必減女直九月丁卯朔女直陷黃龍府已
已歸刺還女直復遣賽刺陽爲卑辭實欲求戰書進上大怒下
詔有女直作過大軍翦除之語十一月命駙馬蕭特末林牙蕭
察刺等將騎兵五萬步卒四十萬至幹鄰濼上自將親軍七十
萬至施門十二月戊申戰于護步答岡敗績盡亡其輜重是歲
耶律章奴謀立魏國王淳饒州渤海古欲自稱大王以蕭謝佛

聞等討之而敗復命南面副部署蕭阿蘇幹招獲之耶律張家奴又叛以北面林牙耶律馬哥致討六年正月東京留守蕭保先爲政嚴酷渤海人患苦攻殺之其裨將高永昌僭號稱隆基元年遣蕭乙薛高興招之不從閏月己亥遣蕭韓家奴張琳往討戊午貴德州守將耶律余覲以廣州渤海叛附永昌我師擊敗之二月戊辰侍御司徒撻不也等與張家奴戰于祖州敗績乙酉復遣蕭特末率諸將往討戊子張家奴誘饒州渤海及中京賊侯槃等萬餘人攻陷高州三月東而行軍副統酬幹等擒侯槃于川州四月戊辰親征張家奴敗之饒州渤海平丙子賞功奪張琳官琳因奏前日之敗失於輕舉若用漢兵二十萬分道而進計無不克上許其半詔中京上京長春遼西四路討戶產出軍有雜畜十頭以上皆籍之至有起至二百軍者生業

蕩散民甚苦之四路軍甫集誅復遁去五月女直攻蒲州東京
陷擒高永昌族人痕孛鐸刺吳十撻不也道刺剌幹等十三人
皆降女直七月泰州渤海二千餘戶叛東北路統軍使勤兵追
及盡俘以還八月烏古部叛遣中丞耶律撻不也等招降之十
一月東面行軍副統馬哥等攻曷蘇館敗績削官 七年正月
女直軍攻泰州復下泰州東北面諸軍不戰自潰女古皮室四
部及渤海人皆降二月漆水縣賊董龐兒聚衆萬餘西京畱守
蕭乙薛南京統軍查刺與戰于易水破之三月龐兒黨復聚乙
薛擊破之于奉聖州五月庚寅東北面行軍諸將涅里合魯涅
哥虛古等于禁地射鹿棄市八月命都元帥赴沿邊會四路兵
馬防秋九月上白燕至陰涼河置怨軍八營募自宜州者曰前
宜後宜自錦者曰前錦後錦自乾自顯者曰乾曰顯又有乾顯

大營巖州營凡二萬八千餘人屯衛州蔡蔡山十二月丙寅都
元帥遇女直軍戰于蔡蔡山敗績女直進拔顯州旁近州郡庚
午下詔自責癸酉遣奇离畢查刺與太公鼎諸路募兵是歲女
直鐵州楊朴說阿骨打自古英雄開國受禪必先求大國冊封
遂遣使來求封 八年正月山前諸路大饑初削榆皮旣而人
相食丁亥遣耶律奴哥等使金議和時東路諸州盜起掠民充
食安生兒張高兒聚衆二十萬霍六哥陷海北州耶律馬哥等
斬生兒于龍化州高兒亡入懿州與六哥介趣義州回離保等
擊敗之二月奴哥還金主復書稱朕要以兄事歲貢方物仍歸
上京中京興中三路州縣以親王公主駙馬大臣子孫爲質及
遣行人并元給信符宋夏高麗往復書詔表牒方可約和三月
甲午復遣奴哥使金要以酌中之議五月戊戌金主遣胡突哀

與奴哥持書報知前約六月丁卯遣奴哥等齎宋夏高麗書詔
表牒至金七月獵秋由金復遣胡突來免取質子及土京興
中府所屬州郡裁減歲幣之數固欲事以兄禮冊用煇儀八月
庚午遣奴哥突迭使金議冊禮九月金畱突迭遣奴哥還如言
不從勿復遣使十二月甲申議定冊禮遣奴哥使金是年放進
士王暉等百三人 九年正月金遣烏林荅贊謨持書來迎冊
三月丁未朔遣知右夸葛畢事蕭習泥烈等冊金主爲東懷國
皇帝七月金責冊文無兄事之語不言大金而云東懷乃小邦
懷其德之義及其中有果材二字語涉輕侮若還芬多哉等語
又非善意殊乖體式如依前書所定然後可從九月復遣習泥
烈與楊立忠持冊藁使金烏林荅等亦還是歲賊張撒八誘中
京射柳軍僭稱南面軍帥余覩擒之阻卜補疎只等叛執招討

使耶律幹里朶都監蕭斜里待死之耶律陳國奴等二十餘人謀反伏誅 十年二月金復遣烏林荅贊謨持書及冊文副本以來仍責乞兵于高麗三月庚申以金人所定大聖二字與先世稱號同復遣習泥烈往議金主怒遂絕之四月獵狐土白山間金師再舉耶律白斯不等選精兵三千以濟師五月金攻上京克外郭留守撻不也率衆出降六月乙酉以北府宰相蕭乙薛爲上京留守知鹽鐵內省兩司東北統軍司事

保大元年正月丁酉朔改元肆赦時郡縣所失幾半上有四子長趙王母趙昭容次晉王母文妃次秦王許王皆元妃生國人知晉王賢深所屬望元妃兄樞密使蕭奉先恐秦王不得立潛圖之文妃姊妹三人長適耶律撻葛里次卽妃次適余覲一日其姊妹俱會軍前奉先諷人誣駙馬蕭昱及余覲等謀立晉王

事覺昱撻曷里等伏誅文妃賜死獨晉王未忍加罪余覲在軍中聞之大懼卽率千餘騎叛入金上遣知奚王府事蕭選買北府宰相蕭德恭大常袞耶律諦里姑歸州觀察使蕭和尚奴四軍并太師蕭幹將所部兵追之始肯追襲不及反授以官十一月癸亥以西京留守趙王習泥烈爲惕隱二年正月乙亥金克中京下澤州帝出居庸關至鴛鴦濼余覲引婁室孛董奄至蕭奉先曰余覲此來欲立甥晉王耳何惜一子明其罪誅之余覲可不戰退矣帝遂賜晉王死王素有人望諸軍聞其死無不流涕由是人心解體余覲引金人巡行宮帝率衛士五千餘騎幸雲中遣傳國璽于桑乾河二月甲午以北院大王耶律馬哥漢人行宮都部署特末並爲都統太和宮使耶律補得副之將兵屯鴛鴦濼己亥金師敗奚王霞末于北安州降其城三月辛

酉帝聞金師將出嶺西遂趨白水寨乙丑群牧使謨魯幹降金丙寅帝至女古底倉金兵將近計不知所出乘輕騎入夾山方悟奉先之不忠怒曰汝父子誤我至此始誅奉先逐蕭得里底召撻不也典禁衛丁卯以副使蕭僧孝奴知北院樞密使事同知院事蕭查刺爲左丞離畢戊辰殿前點檢同知耶律高八率衛士降金己巳金軍獲偵人蕭和尚牌甲郎君耶律哂斯癸酉諸局百工多亡詔凡扈從不限吏民皆官之四月辛卯西南面招討使耶律佛頂及雲內寧邊東勝等州皆降阿疎仍被金擒金已取西京沙漠以南部族皆應帝遂遁於訛莎烈北部謨葛失廕馬馳食羊五月甲戌都統馬可收集散亡會于溫里謹拜知北院樞密使事謨葛失復以兵來援金人敗之于洪灰水擒其子陀古及其屬阿敵音夏國援兵至亦爲所敗七月乙丑上

京毛八十率二千戶降金辛未夏國遣曹价來問起居八月戊戌親遇金軍戰于石雉驛敗績都統蕭特末及其姪撒古被執辛丑會軍于歡撻新查刺金兵追之急棄輜重以遁九月敵烈部叛都統馬哥克之十月金兵降蔚州十一月乙丑聞金兵至奉聖州遂率衛兵遁于落昆髓金兵臨居庸關厓石自崩戌卒多壓死十二月金撫定南京上由埽里關出居四部族詳穩之家三年正月丁巳奚王回離保僭號稱天復元年命都統馬哥討之庚辰宜錦乾顯成川豪懿等州相繼皆降二月乙酉朔興中府及來州并歸德軍節度使田頔權隰州刺史杜師回權遷州刺史高永昌權閭州刺史張成皆籍所管戶降金癸巳興中宜州復城守三月駐蹕于雲內州南四月甲申朔以蕭僧孝奴爲諸道大都督戊戌金圍輜重于青冢硬塞泰許二王及諸

妃公主從臣皆陷沒壬寅金遣人以書來招癸卯荅言請和丙午金兵送族屬輜重東行遣兵邀戰于白水梁趙王習泥烈蕭道寧皆被執帝遣牌印郎君謀盧瓦送兔紐金印偽降遂西遁雲內駙馬乳奴詣金降己酉金帥復以書來不許請和五月己卯夏國遣使請臨其國辛酉渡河止于金肅軍六月遣使冊李乾順爲夏國皇帝十月復渡河東還居突呂不部四年正月帝趣都統馬哥軍金人來攻柰營北遁馬哥被執謨葛失來迎監馬馳羊率其部人防衛封爲于越王二月耶律遙設等十人謀叛伏誅先是大石林牙已爲金所執數月復歸帝自謂天助又得陰山室韋謨葛失兵謀復收燕雲率諸軍出夾山下漁陽嶺取天德東勝寧邊雲內等州南下武州遇金人戰于奄遏下水復潰直趨山陰八月國舅詳穩蕭撻不也筆硯祇侯察刺降

金是月金主阿骨打死九月建州降金十月招古牙亦率衆降
金攻興中府咸無拒意十一月從行者舉兵亂北虜衛太保木
者舍利詳穩牙不里等擊敗之十二月置二總管府五年正
月辛巳党項小斛祿遣人請臨其地戊子趨天德過沙漠金兵
忽至帝徒步乘張仁貴馬得脫近侍進珠帽却之己丑遇雪無
禦寒具途次絕糧木者進貂帽及麩與衆衆惟自齧冰雪欲憩
卽跪坐木者之股復倚之假寐過天德己夜將宿民家給曰偵
騎其家知之乃叩馬首跪而大慟潛宿其家居數日嘉其忠遙
授以節度使遂趨党項以小斛祿爲西南面招討使總知軍事
仍賜其子及諸校爵賞有差二月至應州新城東六十里爲金
將完顏婁室等所獲八月癸卯至金丙午降封海濱王以疾終
年五十四在位二十四年金皇統元年二月改封豫王五年葬

于廣寧府閭陽縣乾陵旁

弘簡錄卷二百六終

弘簡錄卷二百七

明刑部員外郎仁和弘齋邵經邦學

皇清翰林院侍講學士四世孫遠平校閱

載記 遼后妃

太祖后

太宗后

世宗后

妃 魏氏

穆宗后

景宗后

聖宗后

上德 欽哀

興宗后

貴妃

道宗后

惠妃

天祚后

德妃 元妃 文妃

遼因突厥舊俗稱皇后曰可敦國語謂之咸俚蹇尊稱曰耨斡

麼麼母稱幹 后土稱

亦作改耨蓋以配后土而稱為母太祖卽位始從

唐制尊祖母曰太皇太后母曰皇太后嬪曰皇后本無姓氏以

營慕漢高帝故耶律儼舊史稱劉氏其后族乙室拔里世任國

事以比蕭相國故后皆為蕭氏云 太祖后述律氏諱平其先

回鶻人糯思生魏寧舍利魏寧生慎思梅里慎思生婆姑梅里
婆姑名月梳仕遙輦氏爲阿扎割只娶勻德慈王女生后于契
丹右大部自幼簡重多智而忍後歸太祖果斷有雄畧諺語地
祇爲青牛姬有童謠曰青牛姬曾避路及迎后至遼土二河之
會忽有女子乘青牛車倉卒不見自此興兵動衆嘗與后謀遇
太祖乘虛渡磧襲擊党項黃頭吳泊二室羣后勒兵以待奮擊
大破之名震諸寨卽位並上尊號曰地皇后又加號應天大明
晉王李存勗欲結爲援事以叔母幽州劉守光遣韓延徽來聘
太祖怒其不拜畱使牧馬諫曰守節不屈此必賢者宜禮用之
得召見與語大悅以爲謀主將選三萬騎攻幽州勸曰豈有試
讐而攻人國者指帳前樹曰無皮可以生乎太祖曰不可后曰
幽之有土有民亦由是耳吾以三千騎掠其四野不過數年因

而歸我矣何必爲此萬一不勝爲他國笑吾部落不將解體乎其謀畧多此類後平渤海亦預有謀太祖崩悉召從行將帥等妻謂曰我今爲寡婦汝等豈宜有夫因殺大將百餘曰可往從先帝于地下左右有過者亦多殺於幕隧中大將趙思溫以材勇爲太祖所寵後因事怒之使送木葉山不肯行后曰爾先帝親信安得不往見之思溫對曰親莫如后何乃不行后曰我本欲從以子幼國中多故尚未能也今可斷吾一臂以送之左右切諫乃斷其一腕納于壙中而釋思溫不殺凡生三子太祖嘗謂太宗必興我家后欲令太子倍避之乃冊爲東丹王又常屬意少子李胡太宗卽位尊爲皇太后建生日爲永寧節十月癸卯永寧節帝率羣臣上壽延和宮天顯五年正月甲午朝皇太后十年二月丙戌皇太后父族及母前夫之族二帳並爲國舅

以蕭緬思爲尚父領之十一年七月上以李從珂弑君自立神人共怒白太后宜行天討十二月戊子以滅唐立晉遣使馳奏太后十二年正月丙戌駕還遣侍衛實魯趣行戊寅朝于皇太后十月庚辰朔永寧節晉及回鶻燉煌諸國皆遣使來賀會同元年九月庚戌晉遣司空馮道散騎常侍韋勳來上尊號曰廣德至仁照烈崇簡應天皇帝太后御開皇殿受冊三年七月癸酉朝于皇太后五年七月丁丑違豫上馳入侍湯藥仍告太祖廟幸菩薩堂飯僧七日乃愈及滅晉勸帝欲用一漢人爲主太宗不可怒曰汝得中原不能有後必有禍悔無及矣旣而太宗果崩于路后不哭撫其尸曰待我國中人畜如故然後葬汝及世宗卽位遷后于祖州應曆三年崩年七十五祔葬祖陵諡貞烈重熙改諡淳欽

太宗后蕭氏小字溫淳欽皇后弟室魯之女帝爲大元帥納爲妃生穆宗及卽位立爲皇后性聰慧潔素尤被寵顧雖軍旅田獵必與天顯九年十二月壬辰皇子阿鉢撒葛里生不豫明年正月戊申崩于行在五月甲午朔始製服行喪丙午葬于泰陵上自製文諡曰彰德十年十一月丙午幸弘福寺爲皇后飯僧重熙同改諡靖安

世宗后蕭氏小字撒葛只淳欽皇后弟阿古只之女帝爲永康王納之生景宗天祿末立爲皇后明年秋生萌古公主在辟察割作亂后乘步輦直詣弒所請畢收殮明日遇害諡曰孝烈重熙同改諡懷節 妃甄氏後唐宮人有姿色帝從太宗南征得之寵遇甚厚生寧王只沒及卽位立爲皇后嚴明端重風神閑雅內治有法莫敢于以私劉知遠郭威稱帝世宗承強盛之資

奄奄歲時后與叅帷幄密贊大謀不果後亦死察割之難景宗立葬二后于瑩巫閭山建廟陵寢之側

穆宗后蕭氏內供奉翰林承旨知璠之女生有雲氣馥郁久之幼有儀則帝居藩納爲妃及正位中宮性柔婉不能規正無子景宗后蕭氏諱綽小字燕燕父思溫有傳后早聰慧思溫愛之過於諸女卽位選爲貴妃尋冊爲皇后生聖宗卽位尊爲皇太后攝國政泣語宰臣母寡子弱族屬雄強邊防未靖奈何耶律斜軫韓德讓進曰信任臣等何慮之有后於是悉意與大臣叅決大政統和元年二月丙申詣陵置奠命繪近臣於御容殿尋改爲玉殿酒谷爲聖谷五月乙亥詔近臣議上尊號樞密使韓德度以後漢太后臨朝故事草定之七月甲寅朔臨朝聽政八月辛卯親祭父楚國王墓十二月己亥觀漁于玉盆灣辛丑觀

于濬淵雙溪然萬魚燈二年二月朝皇太后因請觀獵於僊樂川四月庚寅皇太后臨決滯獄六月己卯朔又決獄至月終七月癸丑行再生禮三年六月甲戌親決滯獄八月癸未帝奉皇太后謁乾顯二陵四年正月丁卯朝皇太后決滯訟三月辛巳宋兵入涿州上與皇太后駐兵馳羅口詔趣東征兵馬以爲應援委于越休哥以南邊事四月癸未休哥提聞上祭天地率羣臣賀于皇太后庚申上朝皇太后五月壬申皇太后生辰從還九月甲午皇太后行再生禮爲帝祭神祈福十一月祭日月爲駙馬勒德祈福五年四月丁酉朔百僚冊上皇太后尊號曰睿德神畧應運啟化承天皇太后六年八月丁酉幸韓德讓帳厚加賞賚七年四月己未幸延壽寺飯僧丁卯謁奇首可汗廟十年九月癸卯幸五臺山金河寺飯僧十二年四月戊戌景宗并

太后石像成幸延壽寺飯僧九月丁卯奉安石像于延芳淀及
乾州十五年二月丙午夏國遣使來貢并問安皇太后八月丁
酉戒帝獵于平地松林十九年四月丙午帝問安皇太后二十
一年三月甲午朝皇太后七月丙戌朝皇太后二十二年四月
丁卯朝皇太后十二月戊子宋遣李繼昌請和尊太后爲叔母
二十三年二月辛酉朝皇太后五月戊申朔宋遣孫僅等來賀
生辰七月癸丑問安皇太后十月戊子朝皇太后十一月戊申
太后遣太師益奴政事舍人高正使宋賀正旦二十七年十二
月乙酉不豫戊子肆赦辛卯崩于南京行宮明年正月癸酉奉
安梓宮于乾州鼓塗殿謚曰聖神宣獻皇后重熙十一年興宗
與皇太后素服飯僧于延壽憫忠二寺二十一年改謚睿智后
明達治道聞善必從故羣臣咸竭其忠習知軍政澶淵之役親

御戎車指麾三軍賞罰信明將士用命聖宗稱遼盛主后教訓爲多焉

聖宗后蕭氏小字菩薩哥睿智皇后弟駙馬隗因之女母公主粘米衮年十二美而才選入掖庭事帝凡四十年統和十九年三月皇后蕭氏以罪降爲貴妃五月更冊爲齊天皇后素有巧思嘗以草造爲殿式密付有司令造清風天祥八方三殿旣成益寵異之所乘車置龍首鵬尾飾以黃金又造九龍輅諸子車以白金爲浮圖夏秋從行山谷間花木如繡車服相錯人望之以爲神仙開泰三年與上同獵瑞巖原太平三年七月丙戌立生日爲順天節宋遣薛奎郭盛來賀七年上與臨幸祇拜后父母空帳失致敬禮今後可設像拜謁生二子皆夭養宮人擗斤所生子爲已子卽興宗也視如已出興宗侍后亦謹擗斤不悅

帝大漸令左右扶后出晉以老物寵亦有既耶帝崩遂自立是爲欽哀皇后護衛馮家奴喜孫等希旨誣告北府宰相蕭浞卜國舅蕭匹敵謀逆詔令鞠治詞連及后與宗聞之曰皇后撫育眇躬當爲太后今不果立反可罪之乎欽哀曰此人若在恐爲後患帝曰后無子而老雖在無能爲也欽哀不從遷后于上京車駕春蒐欽哀慮帝懷鞠育恩馳遣人加害后語其人曰我實無辜天下共知待我浴而後就死人退后乃自縊年五十是日若有見后于木葉山陰者乘青蓋衛從甚盛後追尊仁德皇后與欽哀並祔慶陵 欽哀亦姓蕭氏小字穉斤淳欽皇后阿古只五世孫黜而狠視母嘗夢金柱擎天諸子欲上不能穉斤後至與僕從皆升異之久之入宮嘗拂承天太后榻獲金鷄吞之膚色光澤勝常太后驚異曰是必有奇子已而果生與宗卽位

尊爲皇太后攝政追封曾祖爲蘭陵郡王父爲齊國王諸弟亦
皆王封以生辰爲應聖節賜駙馬蕭釗不里蕭匹敵死殺其黨
彌勒奴觀音奴等圍場都太師女直著骨里右祇候郎君詳穩
蕭延畱等七人棄市成籍其家七月丙午朔率皇族大臨于太
平殿宋遣孔道輔魏昭文賀皇太后冊禮梅詢張綸帛慰復遣
右領軍衛上將軍耶律遜少府監馬惲充謝宋使十一月乙未
問安皇太后重熙元年十一月巳卯上尊號法天應運仁德章
聖皇太后宋遣陳瑛王克善來賀又遣劉隨王德來賀應聖節
三年后陰召諸弟議欲立少子重元帝乃收太后符璽遷于慶
州七括宮六年秋帝悔之七年春遣使問安親馭奉迎居大安
宮侍養益謹獵金山進鹿尾茸十一月辛丑問安進珍玩十二
月甲申命日進酒八年七月迎至顯州共謁闕陵十一月戊戌

朝皇太后召僧問佛法戊申行再生禮大赦九年三月辛未應
聖節大赦十年九月辛亥朔朝皇太后庚申皇太后射獲熊上
進酒爲壽十一年正月戊申奉迎皇太后于內殿十二月癸卯
朝皇太后十五年應聖節減死罪釋徒以下十六年四月不豫
丙午愈丁卯肆赦十二月癸丑問安皇太后二十年十二月乙
酉皇太后行再生禮肆赦二十一年十二月庚子應聖節曲赦
徒以下罪二十三年加上尊號仁慈聖善欽孝廣德安靜貞純
懿和寬厚崇覺儀天皇太后后常不懌帝崩殊無戚容見崇聖
皇后悲泣如禮謂曰汝年尚幼何哀痛如是清寧元年尊爲太
皇太后十二月戊子應聖節帝上壽宴羣臣命婦二年曲赦百
里內囚三年十二月戊辰不豫曲赦行在五百里內囚已巳崩
更諡欽哀皇后

興宗后蕭氏小字撻里欽哀皇后弟孝穆長女性寬容姿貌端麗帝卽位入宮生道宗重熙四年皇后蕭氏以罪降爲貴妃三月乙酉朔冊立爲皇后十一年冊上尊號曰貞懿宣慈崇聖皇后二十三年再冊號貞懿慈和文惠孝敬廣愛崇聖皇后道宗卽位尊爲皇太后清寧二年上尊號曰慈懿仁和文惠孝敬廣愛宗天皇太后三年八月辛亥帝上詩皇太后曰君臣同志華夸同風八年行再生禮曲赦西京罪囚九年秋敕睦宮使耶律良以重元反狀密告太后乃言于帝曰此社稷大事宜早爲計帝始以爲疑至是戒嚴及戰太后親督衛士破逆黨咸雍元年七月丙子皇太后射獲熊賞賚百官十月己亥又射獲虎大宴羣臣令各賦詩六年十二月己未坤寧節赦徒罪以下八年十二月丁丑坤寧節又大赦太康二年崩更諡仁懿皇后素性仁

慈淑謹中外感德凡正旦生辰諸國貢幣悉賜食幣嘗夢重元
曰臣骨在太子山北不勝寒栗寤卽命屋之其慈憫多類此
貴妃蕭氏小字三姐駙馬都尉匹里之女太平八年選入東宮
爲太子妃卽位立爲皇后以罪降

道宗后蕭氏小字觀音父惠有傳后姿容冠絕工詩善談論自
制歌詞尤善琵琶重熙中納爲燕趙王妃清寧初立爲皇后上
尊號曰懿德皇太叔重元妻以艷冶自矜后見之戒曰爲貴家
婦何必如此及生太子濬有專房寵好音樂伶官趙惟一得侍
左右太康初宮婢單登教坊朱頂鶴誣后與惟一私樞密乙辛
以聞詔與張孝傑劾狀因而實之族誅惟一高長命並籍家資
賜后自盡歸其尸於家乾統初追諡宣懿皇后合葬慶陵惠
妃蕭氏小字坦思父別里刺祇候郎君叔余里也西北路招討

使兄霞抹附馬都尉太康元年乙辛既誣皇后因讐之選入掖
庭立爲皇后封父趙王叔遼西郡王霞抹柳城郡王居數歲未
見皇嗣后妹幹特懶先嫁乙辛子綏也后以宜子言于帝離婚
納宮中八年皇孫延禧封梁王降爲惠妃徙乾陵還幹特懶于
其家大安二年其母燕國夫人削古厭魅梁王伏誅貶妃爲庶
人幽于宜州天慶六年召還十二月乙亥封爲皇太妃後二年
奔黑頂山卒葬太子山

天祚后蕭氏小字奪里懶宰相繼先五世孫大安三年入宮明
年封燕國王妃乾統初冊爲皇后性閑淑有儀則兄弟奉先保
先等緣后寵柄任女直亂從天祚西狩以疾崩 德妃蕭氏小
字師姑父常哥有傳壽隆二年入宮封燕國妃明年三月辛酉
生子賜名撻魯仍給官屬錢帛乾統三年改德妃以柴冊禮封

撻魯爲燕國王加妃號養翼乾統四年王薨以哀戚卒 文妃

文妃

蕭氏小字瑟瑟國舅大父房之女乾統初帝幸耶律撻葛第見而悅之匿宮中數月皇太叔和魯幹勸帝以禮選納三年冬立爲文妃生蜀國公主晉王敖盧幹尤被寵幸以柴冊加號承翼善歌詩女直亂帝畋遊不恤忠臣多被疎斥妃作歌諷諫其詞曰勿嗟塞上兮暗紅塵勿傷多難兮畏夸人不如塞姦之路兮選取賢臣直須卧薪嘗膽兮激壯士之損身可以朝清塞北兮夕枕燕雲又歌曰丞相來朝兮劔佩鳴千官側目兮寂無聲養成外患兮嗟何及禍盡忠臣兮罰不明親戚並居兮藩屏位私門潛畜兮爪牙兵可憐往代兮泰天子猶向宮中兮望太平天祥見而銜之播遷以來郡縣所失幾半上頗有倦勤之意元后兄蕭奉先深忌晉王誣以妃與閭謀立之事賜死 元妃蕭氏

小字貴哥燕國妃之妹年十七冊為元妃性沉靜嘗晝寢近侍盜貂襴妃覺而不言宮掖稱其寬厚從天祚西狩以疾薨舊史贊曰遼以鞍馬為家雖后妃往往長於射御軍旅田獵未嘗不從如應天之奮擊室韋承天之御戎涇淵仁懿之親破重元古所未有亦其俗也靖安無毀無譽齊天巧思乃奢侈之漸宣懿度曲知音故致誣譏文妃能歌詩諷諫而訓謀私其子寃矣若簡憲之艱危保孤懷節之從容就義雖烈丈夫何以過之欽哀狠桀賊殺嫡后而興宗不能以禮防閑之惜哉

載記 遼系屬

太祖弟

蘇頗

奴瓜蒲古

拔里得

子海

魯不古

子賢

合住

子倍

道隆先

李胡

完喜隱

牙里果

子敵祿

朔古

顏里

太宗子

鼐撒葛天德

世宗子

只沒

景宗子

隆慶

聖宗子

宗簡宗愿宗偉

興宗子

和魯幹阿速

道宗子

濬

天祚子

放盧幹雅里

耶律大石

附

太祖異母弟蘇字雲獨昆行六爲人性柔順事上忠謹言無隱情太祖尤愛之二十功臣蘇居其一滄州節度使劉守文求救命往救解其圍刺葛詐降蘇往來其間及平其力居多時因亂後名族多羅禍南府宰相之位久虛以勦得部轄得里只里古攝府中蘇數請擇任宗室上從之在位頗以賄聞民咸怨之天贊三年九月丙午與南院孛羅董迭里畧地西南乙卯獻俘天顯初從征渤海還九月壬戌薨孫奴瓜字延寧有膂力善調鷹隼統和中爲黃皮室紂都監擊敗楊繼業盡復所陷城邑軍還加諸衛小將軍伐宋有功遷黃皮室詳穩六年再舉將先鋒軍敗宋游兵于定州授東京統軍使加金紫崇祿大夫從奚王

和剌奴伐兀惹失利削階十九年復拜南府宰相伐宋至懿都
擒其將王繼忠俘殺其衆以功加同政事門下平章事二十六
年改遼興軍節度使開泰初加尚父卒 四世孫蒲古字提隱
以武勇稱統和初爲涿州刺史從伐高麗有功開泰末爲上京
內客省副使太平二年城鴨綠江命守之在鎮有治績五年改
廣德軍節度使尋遷東京統軍使蒞政嚴肅諸部懾服大延琳
叛以書結渤海人夏行美時行美總渤海軍于保州不從其招
執其人送于蒲古乃誘賊八百餘殺之蒲古入據保州斷其車
路黃龍保州遂皆不附惟南北女直從之高麗亦稱其貢延琳
氣沮嬰城自守數月而破以功拜蒲古惕隱加行美同政事門
下平章事錫賚甚厚十一年蒲古爲子鐵驪所弑行美後擢忠
順軍節度使重熙十七年從耶律義先討蒲奴里遷副部署獲

其長陶得里以歸卒上思其功遣使祭于家 奴瓜孫頗的字
撒版素孤介寡合重熙初補牌印郎君清寧初遷知易州去官
部民請畱許之咸雍八年改彰國軍節度使上獵大牢古山謁
于行宮帝問邊事對曰自應州南境至天池皆我耕牧之地清
寧間邊將不謹爲宋所侵烽堠內移似非所宜道宗然之拜北
面林牙後遣人使宋得其侵地命頗的往定疆界還拜南院宣
徽使太康四年遷忠順軍節度使尋爲南院大王改南京畱守
同知召拜南府宰相賜貞良功臣封吳國公轉北院樞密使廉
謹奉公知無不爲大安中致仕卒子霞抹北院樞密副使

耶律拔里得字孩鄰太祖弟刺葛之子太宗卽位以親愛見任
會同七年從討石重貴進圍德州下之擒刺史師居瑤等二十
七人任爲令穩九年再舉兵次渾沱河降杜重威戰功居多八

汴授安國軍節度使總領河北道事師還州郡往往復叛以應
劉知遠因不能守而歸世宗初遷中京畱守卒 子海里性儉
素不喜聲利以射獵自娛雖居閑人敬之若貴官然母的魯與
察割亂遣人召海里拒之亂平的魯以子故獲免保寧初海里
拜彰國軍節度使遷惕隱秩滿稱疾不仕久之復除南院大王
居十餘年領以寬靜戶口增給時議重之宋曹彬米信等來侵
海里有却敵功賜資忠保義匡國功臣封漆水郡王遷上京開
守薨詔以家貧給葬具 子賢適字阿古其嗜學有大志滑稽
玩世人莫之知惟屋質器之語人曰是人當國天下幸甚應曆
中朝臣多以言獲譴獨樂於靜起游獵自娛與親朋言不及時
事會討烏古還擢右皮室詳穩景宗在藩賴其規導穆宗終不
見疑皆其力也卽位以功加檢校太保尋遷授寧江軍節度使

賜推忠協力功臣帝初踐阼疑諸王多萌非望陰倚爲腹心加特進同中書門下平章事保寧二年秋拜北院樞密使兼侍中加號保節功臣三年爲西北路兵馬都部署生平忠介膚敏推誠待人雖燕息不忘政務以故百司字職罔敢偷墮累年滯獄悉決之嘗患大丞相高勲行宮都部署女里及帝姨母保母席寵放肆薰灼一時納賂請謁門若買區言于帝不報以病解職又不允令鐫手印行事乾亨初疾篤得請明年封西平郡王薨年五十三子觀音大同軍節度使

迭刺孫合住字粘衮幼不好弄以近族入侍每從征伐有功保寧初加右龍虎衛上將軍時宋師屢梗南邊拜涿州刺史西南兵馬都監兼招安巡檢等使久任邊防屢有克獲賜推忠奉國功臣然務鎮靜不妄生事以邀近功鄴壤敬畏屬部又安宋數

遣人結歡冀達和意表聞帝許之安邊懷敵多有力焉拜左金
吾衛上將軍護衛太保重熙六年兼長寧宮使秩滿遣攝鎮國
軍節度使卒生平智而有文曉暢戎政臨事明敏善於論鎮范
陽時嘗領數騎徑詣雄州北門與郡將立馬陳兩國利害及周
師侵邊本末辭氣慷慨左右壯之自是邊境數年無事識者謂
合住一言賢於數十萬兵

太祖長子倍小字圖欲自幼向學好賓客通陰陽知音律精醫
藥錢砭之術立爲皇太子遇太祖問侍臣受命之君當事天敬
神朕欲祀有大功德者以何爲先皆以佛對倍曰佛非中國教
惟孔子大聖萬世所尊此最宜先祖大悅卽建孔子廟詔皇太
子春秋釋奠嘗從征烏古党項爲先鋒都統神冊五年九月率
迭刺剖斡離堽汗里軫等畧地雲內天德明年命經畧燕地至

定州祖方與李存勗相拒雲碧店引兵馳赴敗走之會西征畱
守京師因陳取渤海計從振扶餘城上欲括戶口倍諫今始得
地面料民民必不安若乘破竹之勢徑造忽汗城克之必矣從
之命爲前鋒夜圍忽汗城大誣誤降命鎮之敗其國曰東丹城
曰天福制稱人皇王建元甘露賜以天子旌旗冠服設置百官
一用漢法歲貢布十五萬端馬千匹仍諭此地瀕海非可久居
畱汝撫治以見朕愛民之心駕將還作歌以獻陛辭再諭得汝
治東土吾復何憂號泣而別遂如儀坤州未幾太祖討至卽日
奔赴山陵知皇太后本意欲立德光讓以大位立後尚在皇都
詔遣耶律羽之還東丹民以貨束平升其郡爲南京徙倍居之
添置衛士陰伺動靜倍不能安唐明宗遣人踰海持書招之其
使再至因畋遊海上立木刻詩曰小山歷大山大山全無力差

見故鄉人從此投外國竟携高美人而去以來自遼東改瑞州
爲懷化軍拜爲節度使兼瑞慎等州觀察處置等使長興元年
更賜姓李名贊華移鎮滑州遙領虔州節度使其部曲五人皆
賜姓名罕只曰罕友通穆葛曰穆順義散羅曰羅賓德易密曰
易師仁蓋禮曰蓋來賓皆拜歸化歸德將軍郎將會同三年正
月人皇王妃來朝後遇從珂弒立密報太宗請討之遼兵入洛
從珂遣宦者秦繼旻皇城使李彥紳害之年三十八洛陽僧爲
收瘞石敬瑭喪服臨哭以王禮權厝太宗改葬于豎巫閭山諡
曰文武元皇王世宗加號讓國皇帝陵曰顯陵統和中更諡文
獻重熙增諡文獻欽義皇帝廟號義宗生平喜書市至萬卷藏
于豎巫閭絕頂之望海堂工遼漢文章常譯陰符經復善書本
國人物如射獵雪騎千鹿圖皆入宋秘府然性刻急好飲人血

左右姬妾多刺其臂吮之有小過輒挑目封灼不勝其毒二妃
初封皇后諡曰端順柔貞柔貞實生世宗加尊皇太后割察獄
之五子婁國見逆臣彙 隆先字團隱母大氏景宗封平王未
幾兼政事令畱守東京薄賦稅省刑獄恤寡數薦賢能之士
與室魯同討高麗有功還薨葬暨巫閭山之道隱谷爲人聰明
傳學能詩有閨苑集行于世子陳哥保寧末與渤海官屬謀殺
其父舉兵作亂上命輟裂而死 道隱字畱隱母高美人生時
適遇父難洛陽僧匿而養之因命今名唐滅詔還京賜居外羅
山地性沉靜有文武才時人稱之景宗時封蜀王爲上京畱守
乾亨元年遷守南京號令嚴肅民獲安業徙封荆王聖宗初立
奏宋遣使獻犀帶請和詔以無書却之統和元年正月甲戌薨
追封晉王

第三子李胡一名洪古字奚隱少勇悍多力母淳欽皇后篤愛之然性殘酷小怒輒黥人面或投水火中以是太祖嘗言人皇王巧太宗有成少者不及天顯四年太宗命帥師討雲中郡縣之未附者丁卯饑之西郊五年正月庚午奏拔寰州捉多俘而還二月癸卯朝上于行在以先所俘渤海戶賜之三月丁卯從李胡請赦宗室舍利郎君以罪繫獄者時皇子尚未生乃立爲皇太弟兼兵馬大元帥八年正月庚子命與左威衛上將軍撒剌率兵伐黨項三月辛卯勝還宴勞之後遇車駕親征常留守京師大同元年滅晉回還遣使問軍前事上報之畧曰初以兵二十萬降杜重威張彥澤下鎮州及入汴視其官屬具員者省之當才者任之司屬雖存官吏廢置猶雛飛之後徒有空巢久經離亂所在盜結土功不息愧餉非時民不堪命河東尚未歸

命西路渠帥亦相黨附夙夜以思制之之術惟推心庶條和協
軍情撫綏百姓三者而已今所歸順凡七十六處得戶一百九
萬百一十八汴州水上炎熱難居若得一年太平可指掌而致
且改鎮州爲中京以備巡幸欲伐河東姑俟別圖世宗卽位鎮
陽太后聞之怒遣李胡率兵以拒安端劉哥遣人馳報世宗請
爲前鋒至秦德泉遇李胡戰敗之與世宗隔潰河而陣各言舉
兵意復整兵拒于橫渡相持數日世宗遣郎君勤德等詣兩軍
諭解太后因屋質諫各罷兵乃言昔我與太祖愛汝異於諸子
諺云偏憐之子不保業難得之婦不主家我非不欲立汝汝自
不能及會議世宗使解劔而言和約旣定趨上京會有告其復
與太后謀廢立者徙之祖州禁其出入誅司徒劃設及楚補里
應曆十年冬坐其子喜隱謀反遂下獄死年五十葬玉峯山西

谷統和中追諡欽順皇帝妃爲皇后重熙更諡章肅后曰和敬
喜隱字完德雄偉善騎射初封趙王以反謀事覺上臨問有狀
議親釋之未幾復反下獄問景宗卽位自脫桎梏而朝上怒曰
汝罪人何得擅離禁所詔誅守者復實于獄會改元赦宥之妻
以皇后姊復封宋王素輕僇無恒小得志卽驕上嘗召不時至
怒而鞭之由是憤怨謀亂貶而復召適見上與劉繼元書辭意
卑遜諫曰本朝於漢爲祖書旨如此恐虧國體帝尋改之保寧
九年六月丙辰授西南面招討使命之河東索吐蕃戶稍見進
用復誘羣小謀反上命械其手足築圍土囚祖州宋降卒二百
餘人欲劫立喜隱以城堅不得入立其子璽禮壽被擒伏誅賜
喜隱死 次完應曆三年與耶君禰幹敵烈謀反事發辭連捲
撒葛林牙華割耶君新羅等皆被執明年禰幹華割伏誅寔及

捲撤葛皆免死景宗進封衛王卒

又次牙里果字敵犇宮人蕭氏生性沉默善騎射天顯三年以
救耶律沙于定州爲李嗣源所獲至石晉立始得還爲惕隱以
疾薨 二子敵祿爲惕隱性質直多膂力聞察割亂入見壽安
王慷慨言願得精兵數百破賊黨王嘉其忠穆宗卽位爲北院
宣徽使上以飛狐道狹詔敵祿廣之明年遷南府宰相將兵援
河東至太原與漢王會于高平擊周軍敗之仍降其衆忻代二
州叛將兵討之會耶律撻烈至敗周師於忻口師還卒 奚低
便弓馬勇攻戰景宗時爲右夸離畢多任以軍事保寧三年正
月甲寅遣人獻敵烈俘詔賜有功將士統和四年爲右皮室詳
穩凡戰必以身先矢無虛發時楊繼業敗于朔州之南匿深林
中有令須生擒繼業奚低以故望袍而射不能有功後太后南

伐屢有戰績爲北院大王保安軍節度事清寧四年爲奚六部大王以病卒

太祖養子朔古字彌骨頂與顏昱俱橫帳孟父房後旣冠爲右皮室詳穩從伐渤海有功天顯七年授三河烏古部都詳穩民安其政平易近民令久其任會同間爲惕隱從征石重貴晉將杜重威擁衆拒潯沱河朔古與趙延壽據中渡橋月餘重威兵却遂降太宗崩命奉其喪歸上京世宗卽位因佐皇太后出師坐是免官卒 顏昱字闡寧夸離董末撥之子爲人性端直會同中領九石烈部政濟寬猛世宗卽位爲惕隱天祿三年兼政事令封漆水郡王穆宗立以匡贊功嘗許以後本部大王會世宗將葬懇言於帝臣蒙先帝厚恩未能報請陪位送之由是不悅寢其議薨

太宗次子朮撒葛初封太平王世宗詔許與晉王往復以昆弟
禮穆宗因同母弟委以國政坐謀反辭連貶西北邊戍景宗卽
位朮撒葛懼竄入大漠杳離畢粘木袞以陰附伏誅未幾召還
釋其罪進封齊王保寧四年病疽薨贈皇太叔諡欽靖 天德
字苾扇宮人蕭氏生與敵烈必攝同母爲人猛悍超捷人望而
畏太宗拒杜重威欲以計破之募能斷糧道者從天德請令引
五千騎從間道擊走衛送之軍火其輜重重威窮蹙乃降會同
三年五月甲申遣與檢校司徒耶用和使晉世宗卽位因遣護
送太宗靈柩于上京與李胡遇泰德泉力戰敗之太后不悅遂
不復用後坐與蕭翰等謀反伏誅 敵烈字已速董爲人多力
善射應曆九年與宣徽使耶律海思及蕭達于等謀反事覺穆
宗告祀天地祖考釋之保寧初封莫王宋人侵漠與耶律沙將

兵往接却敵而還乾亨初宋主攻河東至白馬嶺敵烈以先鋒
度潤未半宋軍迎擊師潰與于哇哥俱歿于陣 必攝字箴董
穆宗封爲越王應曆間族人恒特及蕭咬里有罪欲亡必攝密
以聞上以爲忠常命侍從諫上輕殺左右會又欲誅監鹿官固
請得免景宗時討党項有功保寧五年二月壬辰獻俘後以疾
薨

世宗子吼阿不景宗同母兄早薨景宗立親祭于墓號太子院
追冊爲皇太子諡莊聖 只沒字和魯董妃甄氏生敏給好學
通契丹漢字能詩常與宮人私通穆宗怒榜掠繫獄景宗立釋
之賜以所私宮人旋封朔寧王保寧八年妻安只造蟲排奪爵
貶烏古部賦放鶴詩徵還統和初皇太后稱制命賦芍藥詩詔
復舊爵

景宗子隆慶字燕隱小字普賢奴與隆祐皆聖宗同母弟八歲封恒王兼侍中統和中拜南京留守徙梁王十七年南征爲先鋒至瀛州遇宋將范廷召列陣以待隆慶遣蕭柳擊敗之逃入空壑圍而盡虜十九年復敗宋人于行唐開泰初加守太師兼政事令更封晉國王尋拜大元帥南京留守賜金券進封秦晉國王五年九月入覲上親出迎勞至寶德山因同獵于松山十月二月乙酉還至北安州浴溫泉疾薨訃聞上爲哀慟輟朝七日追贈皇太弟葬豎巫閭山子查葛中王郡王保靜軍節度使封潞王太平中各將之官上選官伴讀經史重熙五年爲南府宰相轉南院樞密使九年爲南院大王十一年徙封越國王清寧二年爲上京留守進封魏國王三年復爲惕隱轉遼興軍節度使卒遂哥樂安郡王廣德軍節度使進封幽王爲惕隱重

熙十五年卒 謝家奴長沙郡王世義軍節度使進封陳王清
寧五年移節武定軍乾統六年爲兩院大王不知所終 隆祐
小字高七一字胡都董乾亨初封鄭王統和中伐宋畱守京師
二十一年拜西南面招討使徙王吳及征高麗復爲畱守權知
北院樞密使事出守東京更王楚明年南征復爲畱守開泰初
改王齊薨輟朝五日贈太師諡仁孝重熙間改諡孝靖 子胡
都古封周王遼興軍節度使轉臨海軍 貼不豫章郡王長寧
軍節度使進封陳王爲南府宰相重熙十五年遷中京畱守清
寧三年轉東京五年又轉西京後爲重元所脅削爵流鎮州
聖宗子別古特小字撒剌賜名宗簡爲人明敏善射初授右衛
大將軍太平七年迎領彭信軍節度使爲王子郎君班詳穩重
熙中累遷契丹行宮都部署封柳城郡王討夏國督戰有功重

遠薨 吳哥字洪隱賜名宗愿僕隗氏生開泰二年任惕隱七年授左驍衛大將軍出爲南京畱守薨 侯古字訛里本賜名宗偉初授右衛大將軍重熙初任王子郎君班詳穩十七年封饒樂郡王咸雍中徙混同郡王清寧初爲中京畱守四年遷南院大王八年薨于任遣使致祭

興宗子和魯幹字阿輦與阿璉皆道宗同母弟重熙十七年封越王清寧初徙魯王又進宋國王拜上京畱守改南京加宋魏二國王天祥卽位以爲天下兵馬大元帥加守太師免拜不名三年冊爲皇太叔加號曰義和仁壽六年兼惕隱復守南京重元亂夜赴戰所有詔弛圍場之禁奏曰天子以巡狩爲大事雖居諄諄不可廢也上以爲然復命有司促備春水之行十年閏七月從獵于慶州薨三千石駕宜徽北院使封漆水郡王次遠

次淳 阿璉字訛里本重熙十七年封許王清寧初徙陳王又
進秦國王知中丞司事出爲遼興軍節度使加秦越二國王咸
雍間歷西京上京留守大安三年七月丁丑從車駕秋獵以疾
薨追封秦魏國王 淳小字涅里自幼太后鞠育旣長爲好文
學初封北平郡王昭懷太子廢道宗欲立爲嗣耶律白斯不知
出爲彰聖軍節度使天祚卽位封鄭王乾統二年爲東京留守
加越國王六年拜南府宰相首議制兩府禮儀上喜徙封魏國
王命繼其父留守南京遇冬夏入朝寵冠諸王天慶五年東征
都監耶律章奴與淳子阿撒等三百餘人亡歸欲謀廢立上遣
駙馬蕭昱領兵詣廣平淀護后妃行宮小底乙信持書報魏國
王時章奴先遣淳妃親兄蕭敵里及甥蕭延留以所謀說淳淳
疑此非細事主上自有諸王當立今北南而大臣不來獨汝言

及此何也密令左右拘之有頃乙信等齎御札至備言章奴等
叛淳立斬敵里等傳首以獻卑騎間道詣廣平淀待罪上遇之
如初六年進封秦晉國王拜都元帥賜金券免漢拜禮不名許
自擇將士乃募燕雲精兵東至錦州隊長武朝彥作亂劫淳復
匿而免收朝彥誅之會金兵至戰于阿里軫斗敗績收亡卒數
千拒之淳入朝上再釋其罪詔南京刻石紀功保大二年天祚
入夾山諸大臣奚王回離保林牙大石等引唐黠武故事議欲
立淳淳又不從初詔留宰相張琳李處溫與淳守燕處溫弟處
能子與外假怨軍內納都統蕭幹遂與左企弓虞仲文曹勇義
康公弼集蕃漢百官諸軍及父老數萬人詣淳府勸進處溫邀
琳至自其事琳曰王雖帝冑初無上命攝政則可卽真則不可
處溫曰天意人心已定請立班耳琳始有難色後勉從之處溫

等請之再三曰主上蒙塵中原投機若不立王百姓何歸宜熟計之淳方出與持赭袍被之令百官拜舞山呼淳驚駭辭不獲已乃從之三月卽位號天錫皇帝改是年爲建福元年大赦以處溫守太尉琳守太師企弓守司徒勇義知樞密院事仲文領西京留守內外諸軍都統公弼簽書樞密院事俱賜號忠烈翊聖功臣處能直樞密院爽少府少監提舉翰林醫官李爽陳祕十餘人曾與大計授官有差放進士李寶信等一十九人遷降天祚爲湘陰王以燕雲平上京中京遼西六路號爲北遼淳主之沙漠以北西南西北路兩都招討府諸蕃部族等仍隸天祚自此國分爲二封其妻普賢女爲德妃攝政加企弓侍中以蕭幹爲北樞密使回離保知北院樞密使事駙馬蕭旦同知院事改怨軍爲常勝軍軍旅之事悉委大石遣使報宋免歲幣結好

宋人發兵問罪擊敗之尋遣使奉表于金乞爲附庸事未決六月淳寢疾聞有檄傳天德雲內朔武應蔚等州合諸蕃精兵五萬騎約以八月入燕并遣人問勞索衣裘茗藥淳甚驚懼命南北面大臣議處溫與幹等進迎秦拒湘之說再命集蕃漢百官共議從其議者東立惟南而行營都部署耶律寧西立處溫等問故寧曰天祚果能以諸蕃兵大舉奪燕則是天數未盡豈能拒之否則秦湘父子也拒則皆拒自古安有迎子而拒其父者乎處溫等相顧微笑恐寧扇亂軍心欲殺之淳歛枕長嘆曰彼忠臣也殺之何爲天祚果來吾有死耳復何面目相見耶已而淳薨年六十百官僞諡曰孝章皇帝廟號宣宗葬燕西香山永安陵遣命遙立秦王定以存社稷尊德妃爲皇太后主軍國事權稱制改建福爲德興元年放進士李球等百八人時宋兵來

攻戰敗之人心大悅兵勢日振處溫父子懼禍南通童貫潛納宋兵居民被殺甚衆欲挾太后納土于宋復欲北通于金約爲內應外以擁立大功自陳太后罵曰誤秦晉國王者皆汝父子何功之有乃悉數其過惡數十處溫無以對賜死鬻其子爽而磔之三年太后五表于金求立秦王不從金兵入居庸關德妃出古北口奔天德軍見天祚天祚怒誅德妃降淳熙人除其屬籍盡釋其黨處溫耶律儼姪以儼與蕭奉先厚善得薦爲相感其汲引傾心阿附以固權位而貪污尤甚凡所接引類多小人居位數月籍其家財得錢七十萬緡金玉寶器稱是琳潘州人幼有大志壽隆末爲秘書中允天祚卽位累遷戶部使由樞密副使知本院事項之進南府宰相以諸將皆據權要琳獨十日一朝陽尊以元老實不使與政心懷鬱抱時已年高令子弟上

降表于金詔燕京應琳田宅財物並給還之俄卒

道宗長子濬小字耶魯幹幼而聰慧能言好學知書道宗嘗謂天授六歲封梁王從上獵矢連發三中領左右曰朕祖宗以來騎射絕人威震天下是兒雖幼不墜家風後遇十鹿射獲其九帝喜設宴八歲立爲皇太子大康元年兼領北南樞密院事三月乙巳命寫佛書六月丙辰詔總領朝政仍戒諭之十一月辛酉母后被害太子有憂色耶律乙辛常不自安會護衛蕭忽古謀害乙辛事覺下獄副點檢蕭十三謂乙辛曰今太子見在臣民屬心大王素無根祇之助復有誣后之怨若一旦太子立吾輩措身無地宜熟計之乙辛曰吾憂此久矣卽夜與蕭得裏特謀陷太子陰令護衛太保耶律查刺誣告都宮使耶律撒剌知院耶律速撒護衛蕭忽古謀廢立詔案無迹復令蕭訛都幹等

誣首查刺前告非妄臣實與謀本意欲殺乙辛等然後立太子
臣若不言恐事發連坐帝信之幽太子于別室復令其黨耶律
燕哥往驗太子不服具陳所以誣枉之狀曰帝惟我一子今爲
儲副尚何所求敢爲此事公與我本昆弟行當爲我辯恐之甚
悉蕭十三語燕哥曰若如此奏則大事去矣當易其言爲款伏
上大怒廢太子爲庶人將出曰我何罪十三叱登車遣衛士固
其扉徙于上京囚圍堵中乙辛又用十三計遣蕭達魯古撒把
往害之年二十畱守蕭撻得給聞以疾薨上哀之命有司葬龍
門山欲召其妃乙辛復遣人殺之後知其冤悔恨無及諡曰昭
懷太子以天子禮改葬玉峯山乾統初子延禧卽位追尊大孝
順聖皇帝廟號順宗妃蕭氏貞順皇后

天祚六子長敖盧幹甫髻亂馳馬善射出爲大丞相耶律隆運

後封晉王最爲賢名樂道人善而矜人不能管入寢殿見小底
茶刺閱書因取觀會諸王至見讀書者輒斥陰袖而歸曰勿令
他人見也一時號稱長者及長積有人望內外歸心時趙昭容
生趙王習泥烈元妃生秦王定許王寧元妃兄蕭奉先恐秦王
不得立潛圖謀害會母文妃姊適耶律撻葛里次適耶律余覲
俱會軍前奉先誣與駙馬蕭昱等密謀立晉王事覺余覲降金
放盧幹實不與謀獲免保大二年上聞余覲引金兵奄至不勝
畏懼奉先因給以余覲乃王子班苗裔此來實無亡遼心特欲
立甥晉王耳若爲社稷計不惜一子金兵可不戰自廼上信之
或勸放盧幹亡辭曰安忍爲蕞爾之軀失臣子之大節遂就死
上素服三日諸軍聞者皆爲流涕遠近益皆解體後秦趙許三
王從上至白永濠皆爲金兵所獲次子雅里字撒鷲七歲封

梁王欲立爲皇太子別置禁衛保大三年金師圍青塚塞雅里
在軍中太保特母哥挾之出走間道行至陰山聞天祚已趨雲
內趣赴行在時危從千餘多於天祚慮恐生變欲誅特母哥責
以不能全救諸王伏劍召雅里問曰特母哥救汝何爲雅里對
曰無他言始釋之天祚渡河奔夏軍將耶律敵烈等劫雅里奔
西北部至沙嶺見蛇橫道而過識者以爲不祥後三日羣僚共
立雅里爲主僭卽帝位改元神曆命士庶上便宜素性寬大惡
誅殺凡獲亡者答之而已有自歸者卽官之常謂左右欲附來
歸不附則去何須威逼每取唐貞觀政要及林牙資忠所作治
國詩令侍從讀之烏古部節度使紇哲迭列部統軍撻不也都
監突里不等各率其衆來附自是諸部繼至而雅里日漸荒怠
好擊鞠特母哥切諫乃不復出以敵烈爲樞密使特母哥副之

敵烈効西北路招討使蕭札里焚惑衆心志在不臣與其子麻
涅並誅之以遙設爲招討使與諸蕃戰數敗杖免官從行有疲
困者輒振給之直長保德諫曰今國家空虛賜賚若此將何以
給雅里怒曰昔畋於福山卿誣獵官今復有此言若無諸部我
將何取不納初令羣牧運鹽藻倉粟而民盜之議籍以償雅里
乃自爲直每粟一車抵償一羊三車一牛五車一馬八車一駝
左右曰今一羊易粟二斗且不可得乃償一車雅里曰民有則
我有若令盡償民何堪後獵查刺山一日而射黃羊四十狼二
十一因致疾未踰年卒年三十特母哥降于金

耶律大石字重德世號西遼太祖八代孫通遼漢文字兼善騎
射登天慶五年進士擢翰林應奉尋陞承旨時稱大石林牙

言翰
林也歷泰祥二州刺史遼興軍節度使金祖入居庸關自古北

口亡去以其衆襲奉聖州爲婁室所獲并降其衆幹離不襲遼
主以爲鄉導旣而亡去預謀立秦晉王淳王死復立其妻天祚
責之我在汝何敢輒議改圖對曰陛下以全國不能拒一敵衆
而遠通使黎民塗炭淳乃太祖子孫勝於乞命他人上無以答
賜之酒食赦其罪因力諫天祚始金陷長春遼陽車駕不守廣
平淀而幸中京伺陷上京又幸燕山及陷中京復幸雲中自雲
中而播遷夾山向以全師不謀戰備使舉國漠地皆爲金有勢
已至此方求攻戰甚非長策當養兵畜銳待時而動不可輕舉
上不從大石不自安遂殺蕭乙薛坡里括自立爲王率鐵騎二
百皆遁北行三日過黑水見白達達詳穩牀古兒獻馬馳牛羊
西至可敦城駐北庭都護府會威武崇德會蕃新大林紫河馳
等七州及大王室韋敵刺王紀刺茶赤刺也喜鼻古德泥刺達

刺華達密里密兒紀合只烏古里阻卜普速完唐古忽母思奚
的紉而畢十八部衆諭曰我祖宗艱難創業更世九主歷年二
百金以臣屬逼我國家殘我黎庶屠剪我州邑使天祚皇帝蒙
塵于外日夜痛心疾首我今仗義而西欲借力諸蕃翦我讐敵
復我疆宇惟爾衆亦有軫我國家憂我社稷思共救君父濟生
民於難者乎遂得精兵萬餘戰馬萬匹置南北面官僚立排甲
具器仗明年二月甲午以青牛白馬祭天地祖宗整旅而西先
遣書回鶻王畢勒哥曰昔我太祖皇帝北征過卜古罕城卽遣
使至甘州詔爾祖烏母主曰汝思故國朕卽爲汝復之汝不能
返朕則有之在朕猶在爾也爾祖卽表謝以爲遷國于此十有
餘世軍民皆安土重遷不能復返矣是與爾國非一日之好也
今我將西至大食假道爾國其勿致疑畢勒哥得書卽迎至邸

大宴三日臨行獻馬六百駝百羊三千願質子孫爲附庸送至
境外所過敵者勝之降者安之兵行萬里歸者數國獲駝馬牛
羊財物不可勝計軍勢日盛銳氣日倍至尋思干西域諸國舉
兵十萬號忽兒珊來拒戰兩軍相望二里許諭將士曰彼軍雖
多而無謀攻之則首尾不救我師必勝遣大院司大王蕭幹里
刺招討副使耶律松山等將兵二千五百攻其右樞密副使蕭
刺阿不招討使耶律木薛等將兵二千五百攻其左自以衆攻
其衆三軍俱進忽兒珊大敗僵屍數十里駐軍尋思干凡九十
日回回國王來降貢方物又西至起兒漫文武百官冊立爲帝
以甲辰歲二月五日卽位年三十八號爲兒罕漢尊號曰天祐
皇帝改元延慶追諡祖父爲嗣元皇帝祖母宣義皇后冊妃蕭
氏爲昭德皇后因謂百官朕與卿等行三萬里跋涉沙漠夙夜

艱勤賴祖宗之福卿等之力冒登大位爾祖爾父宜加卹典共
享尊榮自蕭幹里刺而下四十九人祖父封爵有差延慶三年
班師東歸馬行二十日得善地遂建都城號虎思幹耳朶改延
慶爲康國元年三月以六院司大王蕭幹里刺爲兵馬都元帥
敵刺部前同知樞密院事蕭查刺阿不剌之茶赤刺部禿魯耶
律燕山爲都部署護衛耶律鐵哥爲都監率七萬騎東征以青
牛白馬祭天樹旗以誓于衆曰我大遼自太祖太宗艱難而成
帝業其後嗣君耽樂無厭不恤國政盜賊蠭起天下土崩朕率
爾衆遠至朔漠期復大業以光中興此非朕與爾世居之地中
命元帥幹里刺曰今汝其往信賞必罰與士卒同甘苦擇善水
草以立營量敵而進毋自取禍敗也行萬餘里無所得牛馬多
死勒兵而還大石曰皇天弗順數也康國十年殁在位二十年

廟號德宗子夸列年幼遺命皇后權國后名塔不煙號感天皇
后稱制改元咸清在位七年子夸列卽位改元紹興籍民十八
歲以上得八萬四千五百戶在位十三年歿廟號仁宗子幼遺
詔以妹普速完權國稱制改元崇福號承天太后後與駙馬蕭
朶魯不弟朴古只沙里通出駙馬爲東平王羅織殺之駙馬父
幹里刺以兵圍其宮射殺普速完及朴古只沙里普速完在位
十四年仁宗次子直魯古卽位改元天禧在位三十四年時秋
出獵乃蠻王屈出律以伏兵八千擒之而掠其位遂襲遼衣冠
尊直魯古爲太上皇皇后爲皇太后朝女間起居以待終焉直
魯古死遼絕。舊史贊曰耶律淳在天祚之世歷王大國受賜
金券贊拜不名一時恩遇無與爲比當天祚播越以都元帥畱
守南京獨不可奮大義以激燕民及諸大臣興勤王之師東拒

全而迎天祚乎乃自取之是篡也况忍王天祚哉大石既帝淳而王天祚矣復歸天祚責以大義乃自立爲王而去之幸籍祖宗餘威遺智建號萬里之外雖寡母弱子更繼迭承幾九十年亦可謂難矣然淳與雅里大石之立皆在天祚之世有君而復君之其可乎哉與諸葛武侯爲獻帝發喪而後立先主爲帝者不可同年語矣